



Proxecto de decreto polo que se modifica o Decreto 52/2014, do 16 de abril, polo que se regulan as instrucións xerais de ordenación e de xestión de montes de Galicia.

A Lei 7/2012, do 28 de xuño, de montes de Galicia, inspírase en varios principios, un dos cales é a xestión sustentable do monte con arranxo á súa multifuncionalidade ambiental, económica, social, cultural e patrimonial. No seu artigo 8, apartados 37 e 7, respectivamente, define os conceptos de xestión forestal sustentable e certificación forestal.

O desenvolvemento regulamentario da Lei 7/2012, do 28 de xuño, no que se refire á ordenación e xestión dos montes, efectuouse a través do Decreto 52/2014, do 16 de abril, polo que se regulan as instrucións xerais de ordenación e de xestión de montes de Galicia.

Con todo, en Galicia xa existe unha importante superficie de monte cuxa xestión forestal sustentable estaba acreditada antes da aprobación do decreto mediante algúnsistema de certificación forestal internacionalmente recoñecido, e é un claro referente no que a aquel primeiro principio refírese.

A certificación forestal é un mecanismo de mercado cuxo obxectivo é permitir ao consumidor ou consumidora final optar por produtos procedentes de montes cunha xestión forestal sustentable e á súa vez xerar un valor engadido para os xestores destes montes e toda a cadea industrial. A demanda deste tipo de produtos é crecente e inflúe na competitividade do sector forestal de Galicia. A perda do certificado xeraría automaticamente unha perda de valor, tanto da madeira extraída destes montes como dos produtos elaborados a partir dela, e o desabastecemento nas industrias que os utilizan facéndoas perder cota de mercado. Todas as iniciativas vixentes de certificación forestal incorporan como condición obligada que as superficies cun certificado forestal presenten un instrumento de ordenación ou xestión forestal, ademais doutra información e procedementos complementarios.

Por outra banda, a Lei 7/2012, do 28 de xuño, establece que dispoñer dun instrumento de ordenación ou xestión forestal adaptado á regulación contida nela só será obligatorio a partir do prazo establecido na súa disposición transitoria sexta. Con



todo, a disposición transitoria primeira, apartado 2, do Decreto 52/2014, do 16 de abril, reduce este prazo a un só ano para aqueles terreos forestais que posuisen un certificado de xestión forestal sustentable mediante un sistema de certificación forestal internacionalmente recoñecido e non estivesen inscritos no Rregistro de Montes Ordenados.

Co obxecto de garantir o futuro da certificación forestal e evitar prexuízos aos selvicultores ou selvicultoras que dispoñen desta acreditación e ao conxunto da industria forestal galega, procede equiparar a estes montes cos demais en termos de prazos para dotarse dun instrumento de ordenación ou xestión forestal acorde coa Lei 7/2012, do 28 de xuño, e co Decreto 52/2014, do 16 de abril.

Na súa virtude e en uso das atribucións conferidas pola Lei 1/1983, do 22 de febreiro, de normas reguladoras da Xunta de Galicia e da súa Presidencia, por proposta da conselleira do Medio Rural, de acordo co Consello Consultivo e logo de deliberación do Consello da Xunta de Galicia na súa reunión do día

DISPOÑO:

Artigo único. Modificación do Decreto 52/2014, do 16 de abril,, polo que se regulan as instrucións xerais de ordenación e de xestión de montes de Galicia

O apartado 2 da disposición transitoria primeira do Decreto 52/2014, do 16 de abril, polo que se regulan as instrucións xerais de ordenación e de xestión de montes de Galicia, queda modificado como segue:

"2. As superficies de montes ou terreos forestais que dispoñan dun instrumento de ordenación ou xestión forestal vixente vinculado a un certificado de xestión forestal sustentable mediante un sistema de certificación forestal internacionalmente recoñecido e que non estivesen inscritas no Rregistro de Montes Ordenados consideraranse terreos ordenados conforme ao dito instrumento de ordenación ou xestión forestal, só para os efectos dos devanditos sistemas de certificación e ata, como máximo, o vencemento do prazo previsto



na disposición transitoria sexta da Lei 7/2012, de 28 de xuño, de montes de Galicia.”

Disposición derradeira. *Entrada en vigor*

Este decreto entrará en vigor o día seguinte da súa publicación no Diario Oficial de Galicia.


Santiago de Compostela, ____ de _____ de 2016

Alberto Núñez Feijóo

Presidente

Ángeles Vázquez Mejuto

Conselleira do Medio Rural



XUNTA DE GALICIA
CONSELLERÍA DO MEDIO RURAL
E DO MAR

15781 Santiago de Compostela
Tfno.: 981 544 038
Fax: 981 544 037

galicia

INFORME DA SECRETARIA XERAL TÉCNICA SOBRE O PROXECTO DE DECRETO POLO QUE SE MODIFICA O DECRETO 52/2014, DO 16 DE ABRIL, POLO QUE SE REGULAN AS INSTRUÇÓNS XERAIS DE ORDENACIÓN DE MONTES DE GALICIA

Visto o “Proxecto de decreto polo que se modifica o Decreto 52/2014, do 16 de abril, polo que se regulan as instruccións xerais de ordenación de montes de Galicia”, en cumprimento do disposto no artigo 43.2) da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, esta Secretaría Xeral Técnica emite o seguinte

INFORME:

1. COBERTURA LEGAL E CONSTITUCIONAL

O presente proxecto de decreto ten o seu fundamento competencial nos artigos 148.1.8 e 149.1.23 da Constitución Española. O art. 148.1.8 establece que as Comunidades Autónomas poderán asumir competencias en "materia de montes e aproveitamentos forestais". Por outra parte, o art. 149.1.23 outorga ao Estado a competencia para establecer a "lexislación básica sobre montes, aproveitamentos forestais e vías pecuarias".

Sobre a base da tal fundamento constitucional, o Estatuto de autonomía para Galicia indica no seu artigo 27.10 que corresponde á Comunidade Autónoma galega a competencia exclusiva sobre "montes, aproveitamentos forestais, vías pecuarias e pastos, sen prexuízo do disposto no artigo 149.1.23 da Constitución".



No exercicio destas competencias, o Parlamento de Galicia aprobou a Lei 7/2012, do 8 de xuño, de montes de Galicia, na que se establece o marco normativo dos montes ou terreos forestais existentes na Comunidade Autónoma de Galicia, de conformidade co indicado nos citados preceptos e na Lei estatal 43/2003, do 21 de novembro, de montes.

A disposición transitoria sexta, apartado primeiro, da Lei 7/2012, do 8 de xuño, dispón:

“Os montes ou terreos forestais deberán dispoñer dun instrumento de ordenación ou de xestión forestal obligatorio e vixente, como máximo, no prazo de seis anos desde a publicación das instrucións de ordenación de Galicia. En todo caso, o cumprimento desta obriga non poderá superar o prazo sinalado na lei básica. Pasado este prazo sen aprobación, non se autorizarán aproveitamentos forestais nos ditos montes.”

E de acordo co disposto no artigo 78 da Lei 7/2012, do 8 de xuño, o Consello da Xunta, oído o Consello Forestal de Galicia, aprobou o Decreto 52/2014, de 16 de abril, polo que se regulan as instrucións xerais de ordenación e de xestión de montes de Galicia, que foi obxecto de publicación no DOG do 8 de maio de 2014.

A disposición transitoria primeira, apartado segundo, do Decreto 52/2014, de 16 de abril, establece:

“As superficies de montes ou terreos forestais que á entrada en vigor deste decreto posúan certificado de xestión forestal sustentable mediante un sistema de certificación forestal internacionalmente



recoñecido e non estean inscritas no Rexistro de Montes Ordenados consideraranse terreos ordenados conforme un instrumento de ordenación ou xestión forestal durante o prazo dun ano.

Transcorrido o citado prazo, as ditas superficies só poderán manter a dita consideración se no prazo dun ano desde a entrada en vigor deste decreto dispoñen dun instrumento de ordenación ou xestión forestal adaptado á regulación prevista no presente decreto.”

O obxecto do presente proxecto é modificar este apartado segundo da Disposición transitoria primeira.

2. XUSTIFICACIÓN DO PROXECTO

Tal como se recolle na memoria xustificativa, en Galicia existe unha importante superficie de monte cuxa xestión forestal sostible estaba acreditada antes da aprobación do citado Decreto mediante algúns sistema de certificación forestal internacionalmente recoñecido. A certificación forestal configúrase como un mecanismo de mercado cuxo obxectivo é permitir ao consumidor final optar por produtos procedentes de montes con unha xestión forestal sostible e, a súa vez, xerar un valor engadido para os xestores de tales montes e para toda a cadea industrial. Dado que a demanda deste tipo de produtos é crecente e inflúe na competitividade do sector forestal galego, a perda do certificado xeraría automaticamente unha perda de valor, tanto da madeira extraída deses montes como dos produtos elaborados a partir dela, así como o desabastecemento nas industrias que os empregan facéndolles perder cota de mercado.

Tal risco pretende evitarse mediante o presente proxecto regulamentario, establecendo para estas superficies de montes ou terreos



forestais, dotadas dun certificado de xestión forestal sustentable mediante un sistema de certificación forestal internacionalmente recoñecido, a obriga de dispoñer dun instrumento de ordenación ou de xestión forestal obligatorio e vixente, como máximo, no prazo de seis anos desde a publicación das instrucións de ordenación de Galicia, en consonancia co resto das superficies de montes ou terreos forestais, tal como dispón a disposición transitoria sexta, apartado primeiro, da Lei 7/2012, do 8 de xuño, e que o Decreto 52/2014, de 16 de abril, reducira a un ano, prazo de moi difícil cumprimento segundo as principais organizacións do sector.

3. ESTRUTURA E CONTIDO

Respecto a súa estrutura e contenido, o proxecto consta dun artigo único, polo que se modifica o apartado segundo da disposición transitoria primeira do Decreto 52/2014, de 16 de abril, e unha disposición final, referida a súa entrada en vigor.

4. TRÁMITES REALIZADOS E RESULTADOS DOS MESMOS

A presente disposición elaborouse de conformidade co procedemento establecido nos artigos 40 e seguintes da Lei 16/2010, do 17 de decembro, de ordenación e funcionamento da administración xeral e do sector público autonómico de Galicia.

Inciouse a súa tramitación como anteproxecto pola Secretaría Xeral Técnica, acompañado da memoria xustificativa sobre a súa legalidade,

acerto e oportunidade; a memoria económica-financeira e o informe do Servizo Técnico-Xurídico.

Unha vez rematada a fase inicial de elaboración, o texto aprobase pola conselleira do Medio Rural e do Mar como proxecto de decreto.

O proxecto de decreto publicouse na páxina web da Consellería desde 18 de marzo ata o 21 de abril de 2015, tal como consta na certificación expedida polo xerente de proxectos da Consellería do Medio Rural e do Mar da Axencia para a Modernización Tecnolóxica – AMTEGA do 21 de abril de 2015.

Con data 25 de marzo de 2015 a Secretaría Xeral da Igualdade da Vicepresidencia e Consellería de Presidencia, Administracións Públicas e Xustiza emite informe sobre impacto de xénero, formulando unha serie de recomendacións para a eliminación do sexismo na linguaxe normativa. Tales observacións introducíronse no texto en consonancia co indicado no informe.

O proxecto de decreto foi informado favorablemente pola Dirección Xeral de Planificación e Orzamentos da Consellería de Facenda o 23 de marzo de 2015. Por razón do seu contido, non precisa do informe conxunto da Axencia para a Modernización Tecnolóxica de Galicia e da Dirección Xeral de Avaliación e Reforma Administrativa da Vicepresidencia e Consellería de Presidencia, Administracións Públicas e Xustiza

En cumprimento do trámite de audiencia previsto no artigo 42 da Lei 16/2010, do 17 de decembro, envíouse o proxecto de decreto á Federación Galega de Municipios e Provincias, Asociación Sectorial Forestal Galega, Asociación Galega de CMVMC, “Man Común”, Organización Galega de CMVM, Afrifoga, Silvanus, Asociación Forestal




de Galicia, Promagal, Asociación Frouma, Asemfo – Galicia, Federación Empresarial de Aserradores y Rematantes de Maderas de Galicia, Serfoga, Clúster da Madeira, Sindicato Labrego Galego, Xóvenes Agricultores-ASAJA Galicia, Unións Agrarias, Asociación Pura Raza Cabalo Galego, Federación Galega de Caza, Asociación Micolólica, Consello Galego de Consumidores e Usuarios, Colexio de Enxeñeiros Técnicos Forestais de Galicia, Colexio de Enxeñeiros de Montes, Centro de Investigacións Forestais de Lourizán, CIS Madeira (Centro de Innovación e Servizos Tecnolóxicos da Madeira de Galicia), Universidade da Coruña, Universidade de Vigo, Universidade de Santiago de Compostela, Amigos da Terra, Federación Ecoloxista Galega, así como ás secretarías xerais técnicas das distintas consellerías.

As alegacións ao contido do proxecto foron examinadas e valoradas pola Secretaría Xeral de Medio Rural e Montes, co resultado indicado na memoria de procedemento obrante no expediente.

O proxecto foi informado favorablemente pola Asesoría Xurídica Xeral o 27 de xullo de 2015.

O proxecto deberá someterse ao ditame do Consello Consultivo de Galicia por tratarse da modificación dunha disposición ditada en desenvolvemento de Lei, de conformidade co previsto no artigo 12 da Lei 3/2014, do 24 de abril, do Consello Consultivo de Galicia.

Finalmente, e antes da súa elevación ao Consello da Xunta, a titular da Consellería do Medio Rural e do Mar deberá concluir o procedemento mediante unha resolución que aprobe definitivamente o proxecto de decreto, de conformidade co establecido no artigo 43.3 da Lei 16/2010, do 17 de decembro.



XUNTA DE GALICIA
CONSELLERÍA DO MEDIO RURAL
E DO MAR

15781 Santiago de Compostela
Tfno.: 981 544 038
Fax: 981 544 037

galicia

De conformidade co anterior, e tendo en conta os aspectos analizados, o texto proposto reúne os requisitos legais esixidos na normativa de aplicación examinada anteriormente e se cumpriron todos os trámites legais preceptivos, polo que esta Secretaría Xeral Técnica informa favorablemente o texto normativo proposto.

Santiago de Compostela, 31 de xullo de 2015

A secretaria xeral técnica

Isabel Concheiro Rodríguez-Segade